



Adhunto potret di Liliana Braamskamp-Erasmus despues di a caba di registra na e conferencia mainta trempan.

ORANJESTAD - Dia 3 di augustus ultimo, nos escritora y ilustradora conoci entre nos muchanan, Liliana Braamskamp-Erasmus, a subi avion pa un viahe masha largo pa Los Angeles, California. Liliana a bai participa na e congreso organiza pa e di 40 aniversario di SOCIETY OF CHILDREN'S

Escritora y ilustradora Arubano na conferencia na Los Angeles

BOOK WRITERS AND ILLUSTRATORS. Liliana ta un miembro bou categoria P.A.L. (Published and Listed) serca e sociedad y pesey a wordo invita. Ta importante pa bisa cu no tur autor ta haña e tipo di miembrecia aki, ya cu "self-publishing" of compania di publicacion no renombra mundialmente, no ta wordo acepta. Pero SCBWI a reconoce e casnan editorial cu Liliana ta publica cu ne manera Uitgeverij Zwijsen y Uitgeverij Delubas. Esakinan ta companianan cu ta publica riba nivelnan hopi halto y ta wordo reconoci riba mercado di buki di mucha internacionalmente.

For di aña 2009 Liliana ta miembro di e sociedad aki, pero nunca a logra atende e congresonan organiza pa e sociedad den exterior, ya cu nan ta hopi leu y hopi caro. Awor pa e congreso di 40 aña, Liliana a wordo invita pa participa na Los Angeles un siman largo. Aki escritornan y ilustra-

dornan di henter mundo cu ta publica pa mucha lo por participa na diferente tayer, charla, curso cu ta trata diferente area di nan experticio. Tin oportunidad unico pa topa y combersa cu profesionalnan den e mundo publicitario, manera autornan cu renombre mundial, agentenan literario, editor y redactor di e gran casnan editorial di Merca.

SCBWI Summer Conference 2011 ta un evento internacional unda e top profesionalnan den mundo di literatura pa mucha ta bin hunto pa guia, inspira, comparti conocimiento, sostiene e escritor y ilustrador di buki di mucha, pa asina nan por crece como profesional y enrikese e mundo literario. Cu Aruba ta forma parti di un red di profesional extenso asina y ta participando activamente na eventonan literario di e caliber aki, no solamente ta demostra cuanto potencial nos isla tin, pero sigur ta fungi como un ehempel

di con serio cada profesional – sea ta escitor of ilustrador – ta dispuesto pa tuma su mes pa asina mehora su arte y simultaneamente e calidad di den e caso aki, literatura di su pais.

E publicacion di literatura pa mucha, banda di ta un forma di arte, e ta un responsabilidad hopi grandi cu e autor mester ta conciente di dje. Un mucha, un lector cu ta sera conoci cu literatura, merece nada menos cu inspiracion, satisfaccion, asombro, admiracion... motibo pa encanta lesamento, sea ta poesia, storia, kiko cu e arte di palabra tin di ofrece. Ta keda na e autor y ilustrador pa sinti e necesidad aki y aspira e mihor cu e tin den dje pa por satisfacer su lectornan. Educando su mes pa mehora su arte, ta muestra e aprecio cu e tin pa su talento y pa otro.

Pa informacion tocante e sociedad y e conferencia: <http://www.scbwi.org>. □